



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 037585 20 Iž**  
**Sarajevo; 14.10.2020.godine**

Sud Bosne i Hercegovine, u drugostepenom vijeću sastavljenom od sudija Vesne Trifunović kao predsjednika vijeća, Dinke Bešlagić-Čovrk i Srete Crnjak kao članova vijeća, odlučujući o žalbi Dušice Milovanović i Milenka Milovanović iz Vlasenice, Republika Srpska BiH, izjavljenoj protiv Odluke Centralne izborne komisije Bosne i Hercegovine broj 05-1-07-1-997/20 od 01.10.2020. godine o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 14.10.2020. godine, donio je

**R J E Š E N J E**

Žalba se odbija.

**O b r a z l o Ź e n j e**

Odlukom Centralne izborne komisije Bosne i Hercegovine broj i datum navedeni u uvodu, utvrđen je i objavljen broj birača upisanih u izvod iz Centralnog biračkog spiska za glasanje izvan Bosne, ukupno 101.771 birača.

Protiv ove odluke žalbu je uložila Dušica Milovanović navodeći da su ona i njen suprug Milovanović Milenko registrovani za glasanje iz Republike Srbije, pa prijavljuje zloupotrebu glasačkog prava i zloupotrebu identiteta i podataka.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci, odnosno odbije kao neosnovana jer u konkretnom slučaju Centralna izborna komisija BiH, imajući u vidu činjenicu da je za žaliteljicu i njenog supruga dostavljena prijava koja ispunjava uslove za upis u izvod iz Centralnog biračkog spiska za glasanje izvan Bosne i Hercegovine iz Srbije, te da podnositelj žalbe nije postupio po zahtjevu CIK-a tj. nije dostavio svojeručno potpisanu izjavu o navodima iz žalbe, iz čega proizilazi da se radi o zloupotrebama biračkog prava.

Pored navedenog istaknuto je da će žaliteljici i njenom suprugu biti omogućeno da glasa nepotvrđenim kovertiranim gasačkim listićem na redovnom biračkom mjestu određenom prema njegovom mjestu prebivališta, a da će CIK BiH u Glavnom centru za brojanje izuzeti glasački materijal dostavljen od žalitelja i isti neće biti prebrojan u cilju sprečavanja zloupotrebe biračkog prava i omogućavanja ostvarivanja biračkog prava biračima kojima ono zaista pripada.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu, Centralna izborna komisija BiH (CIK BiH) je, prije donošenja ožalbene odluke, a prilikom razmatranja prijave dostavljene dana 28.08.2020. godine putem e-maila na ime žalioca Dušice Milovanović i Milenka Milovanović utvrdila da je dostavljen obrazac prijave za glasanje izvan BiH za Dušicu Milovanović i Milenka Milovanovića uz koji je dostavljena kopija važeće lične karte za oboje. S obzirom da je prijava za glasanje izvan BiH ispunjavala sve uslove propisane odredbom člana 3.15 Izbornog zakona BiH, žalilac Dušica Milovanović i njen suprug Milovanović Milenko se nalaze na izvodu iz Centralnog biračkog spiska za glasanje izvan BiH iz Srbije.

U cilju potpunog i pravilnog utvrđenja činjeničnog stanja, imajući u vidu da je navedena žalba dostavljena putem e-maila i da ista nije potpisana, Centralna izborna komisija je putem elektronske pošte dana 5.10.2020. godine na e-mail adresu dušicalukic.osv@gmail.com dostavila zahtjev žaliocu da dostavi skeniranu izjavu o činjenicama navedenim u žalbi, sa svojeručnim potpisom, do 6.10.2020. godine. S obzirom da žalilac nije postupio po navedenom zahtjevu, Centralna izborna komisija je zaključila da se radi o zloupotrebama biračkog prava.

S obzirom na ovakvo činjenično stanje, u situaciji kada žalilac nije postupio po zahtjevu Centralne izborne komisije u cilju utvrđivanja vjerodostojnih činjenica o identitetu žalioca, neosnovanom se ukazuje i žalba žalioca.

Naime, u konkretnoj situaciji nesumnjivo se radi o zloupotrebi biračkog prava. Međutim, Centralna izborna komisija BiH na osnovu raspoloživih činjenica nije bila u mogućnosti utvrditi ko je počinio zloupotrebu biračkog prava za glasanje izvan BiH, jer je zloupotreba mogla biti učinjena, kako od strane žalioca, tako i od strane trećih lica. Međutim, u svakom slučaju žalilac će biti u mogućnosti da iskoristi svoje biračko pravo i da po želji glasa na svom redovnom biračkom mjestu kako za Dušicu Milovanović tako i za njenog supruga Milovanović Milenka, tj. omogućit će im se ostvarivanje biračkog prava biračima kojima oni pripadaju.

Naime, žaliocu će, ukoliko na dan Lokalnih izbora 2020. godine, dođe na redovno biračko mjesto određeno prema njegovom mjestu prebivališta, biti omogućeno da glasa nepotvrđenim kovertiranim glasačkim listićima (član 5.18 Izbornog zakona BiH) koji će biti potvrđeni i prebrojani u Glavnom centru za brojanje, s tim što će Centralna izborna komisija BiH u Glavnom centru za brojanje izuzeti glasački materijal dostavljen eventualno i iz inostranstva na ime žalioca Milovanović Dušice i Milovanović Milenka i isti neće biti ponovo prebrojan, a sve u cilju sprečavanja zloupotreba biračkog prava i omogućavanja ostvarivanja biračkog prava biračima kojima ono zaista pripada.

Prema odredbi člana 5.18 Izbornog zakona BiH, ako se ime birača ne nalazi na izvodu iz Centralnog biračkog spiska zato što se birač upisao u Centralni birački spisak da glasa izvan zemlje, a vratio se da glasa lično u Bosni i Hercegovini, njegovo ime dodaje se na poseban obrazac koji sadrži sve podatke kao i izvod iz

Centralnog biračkog spiska. Birač se potpisuje na izvod i ima pravo glasati nepotvrđenim-kovertiranim glasačkim listićem, u skladu sa odredbama ovog zakona.

S obzirom na navedeno apelaciono vijeće je ocijenilo da se pobijanom odlukom Centralne izborne komisije BiH ne povređuje biračko pravo žalioaca.

Iz navedenih razloga apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

**PREDSJEDNIK VIJEĆA  
SUDIJA  
Vesna Trifunović**